



UNIVERSELE REËLS BY HAELGEWEERSKIETOEFENINGE

1. Algemeen

Dié dokument (Universele Reëls by haelgeweerskietoefeninge) is van toepassing by alle SAJWV kleiteiken haelgeweerskietoefeninge.

2. Skietbaanveiligheidsreëls en Standaardbevele

Verwys asb. na "Skietbaan veiligheidsreëls en Standaardbevele op Haelgeweerbane" - vir laai, ontlaai en veiligheidsprosedures.

3. Stand van skut en Geweerposisie

Skuts mag "geweer-op" (gun-up - kolf teen die skouer) of "geweer-af" (gun-down - kolf 10cm onder en los van skietskouer) staan voordat die klei gegooi word.

In al SAJWV se kleiteikenskietoefeninge en –kompetisies mag daar slegs na kleiteikens gevuur word met die geweer in die skouer (m.a.w. nie vanuit die heup of geweer los van die liggaam nie).

4. Haelgewere

Alle haelgewere is toelaatbaar, mits hulle nie groter as 12 boor is en die looplengte nie minder as 24 duim is nie. 410 Haelgewere word toegelaat. Enkelskoot haelgewere kan slegs vir die Fisanttoefening gebruik word, behalwe waar die skut aanvaar dat hy slegs geregtig sal wees om een skoot te skiet na enige klei en die tweede klei op alle dubbels sal verbeur. Onder geen omstandigheid sal 'n skut toegelaat word om 'n enkelskoothaelgeweer te herlaai vir 'n tweede skoot op enige klei nie.

Semi-outomatiese en pompaksie haelgewere word toegelaat, mits die uitwerp van die gebruikte patroondoppe nie ander skuts ontwig nie – slegs twee patrone mag gelaai word. Dieselfde geld vir slotaksie haelgewere met 'n magasyn.

Drabande op haelgewere is verbode op 'n SAJWV kleiskietbaan.

Alle veranderinge aan haelgewere en omruil van wurg of lope mag nie gedurende die rondte gedoen word nie – wel tussen rondtes.

Skuts in dieselfde aflossing mag nie 'n haelgeweer deel nie.

5. Ammunisie

Slegs #7 tot #9 hael mag gebruik word in SAJWV haelgeweerskietoefeninge, met 28 gram ladings die maksimum wat toegelaat sal word.

Hierdie reël moet streng toegepas word omdat die gebruik van groter hael baie gevaarlik word vir uitval- en die skietafstand van die skoot.

Die baanoffisier **moet** van elke skut in elke aflossing 'n mondelingse verklaring verkry dat die hael waarmee hy/sy skiet aan die voorskrif van hierdie bepaling voldoen voor die rondte 'n aanvang neem.

6. Weiering van 'n geweer

In die geval van weiering van 'n geweer het die skut twee minute om die geweer reg te maak of te vervang.

Die skut is geregtig om voort te gaan in dieselfde aflossing, mits die skut 'n ander geweer kan bekom. Indien nie, moet hy sy plek in die aflossing verlaat en die res van sy rondte klaarmaak sodra daar 'n oop plek in 'n ander aflossing is. Of hy moet sy rondte klaarmaak wanneer daar 'n geleentheid is om dit tussen of na ander aflossings af te handel.

7. Geweerbande

Geweerbande op haelgewere is verbode op 'n SAJWV kleiskietbaan.

8. Skietbaadjies

Ligte jag/skietbaadjies mag gebruik word.

9. BAANOFFISIER

Die Baanoffisier is verantwoordelik vir ordelike en korrekte gedrag op die haelgeweerskietbaan en behoort nie ook telling te hou terwyl hy as Baanoffisier optree nie:

- a. Die Baanoffisier moet die resultate van elke skoot beoordeel.
- b. Hy moet alle "kill" en "lost" kleie in 'n duidelike en harde stem uitroep sodat die tellinghouer(s) en skuts die roep duidelik kan hoor – die Baanoffisier neem op sy eie besluite.
- c. Indien 'n skut nie saamstem met die Baanoffisier se besluit nie, moet hy dadelik op die skietpunt beswaar aanteken deur sy arm op te lig en te sê BESWAAR of APPÉL. Die Baanoffisier moet dan die skiet stop en die skut dadelik van sy finale besluit in kennis stel.
- d. Gewere mag nie op 'n skietpunt getoets word voor die begin of na afloop van 'n rondte nie.
- e. Onder geen omstandighede word skuts toegelaat om die kleioorvlugarea te betree nie.
- f. Skuts word nie toegelaat om 'n klei op te tel en te kyk of dit raakgeskiet is of nie.
- g. Toeskouers word slegs by die aangewese punt of 10m agter die skietpunte, buite die gesigsveld, toegelaat.
- h. Slegs die Baanoffisier kan beoordeel of 'n teiken getref of gemis is en of dit gebrekkig en buite die normale trajek gegooi is. Die Baanoffisier se besluit is finaal.
- i. Die Baanoffisier kan die vuurvolgorde stop as daar skielik swaar reën of 'n donderstorm dreig.

10. VEILIGHEID

- a. Alle gewere, hetsy gelaai of ongelaai, moet te alle tye veilig hanteer word.
- b. Gewere moet te alle tye oop en ongelaai gedra word (gebreek en ongelaai), of ongelaai in geweersakke of –tasse gedra word.
- c. Die sluitstukke van slotaksie, semi-outomatiese en pompaksie haelgewere moet oop wees en met die loop wat in die lug op wys, gedra word.
- d. Wanneer 'n geweer nie gebruik word nie, moet dit in 'n skietrak of 'n geweersak gestoor word.
- e. Dis ontoelaatbaar om aan 'n ander skut se geweer te vat sonder sy/haar toestemming.
- f. Geen gesimuleerde skote word buite skietpunte toegelaat nie.
- g. Gesimuleerde skote word nie toegelaat terwyl 'n ander skut op 'n teiken vuur nie,
- h. Daar mag nie op die baan na diere of voëls gemik of geskiet word nie - oortreding = direkte diskwalifikasie.
- i. 'n Skut mag nie op 'n skietpunt op beweeg, voordat die vorige skut dit verlaat het nie.
- j. Die skut mag slegs sy geweer laai as hy op die skietpunt is, met die geweerloop baan-af gerig.
- k. In die geval van skootweiering, weens die geweer of die ammunisie, moet die skut op die skietpunt bly, met die geweer baan-af gerig, sonder om dit oop te maak, tot die baanoffisier dit geïnspekteer het.
- l. Skuts mag nie op die skietpunt omdraai of dit verlaat voor hy nie sy geweer oopgemaak en die patrone uit die kamers of magasyn (in die geval van 'n slotaksie, pomp aksie of semi-outomatiese haelgeweer) verwyder het nie, of hulle nou gevuur is of nie.
- m. Gedurende die skietoefening of tydens 'n breek in die rondte, is die skut se geweer oop en ongelaai.
- n. Alle skuts, baanoffisiere en "trappers" **MOET** oor- en oogbeskerming dra wanneer hulle op die baan is.
- o. Alle toeskouers binne 10m van die skietpunte moet ook oog- en oorbeskerming dra.
- p. Alle "trappers" moet ten minste 16 jaar oud wees, en moet deur strooibale, sinkplaat, of 'n ander tipe van doelmatige beskutting, beskerm word.

11. PUNTEELLING (alle oefeninge)

- a. Punte vir kwalifisering vir toekennings op die Tak, Intertak en Nasionale Haelgeweerskietkompetisie vlak word bereken as die aantal gebreekte kleie gedeel deur die aantal kleie wat die oefening uitmaak, uitgedruk as 'n persentasie.
- b. Punte wat gebruik word met die bepaling van streeks en nasionale ranglyste sal verwerk word gebaseer op die hoogste individuele telling vir die betrokke oefening by die betrokke tak op die betrokke dag wat dan as die maksimum (volpunte) beskou word, die individuele skut se punt sal dan bereken word as 'n persentasie van hierdie hoogste punt (hierdie sal eers van toepassing wees na afloop van die 2016 skietkompetisies).
- c. Skuts het twee skote vir elke klei wat by 'n skietpunt gegooi word (uitgesonder vir dubbel kleie, waar skuts net een skoot per klei het, en by die Fisantoefening waar elke skut slegs een (1) skoot per klei mag vuur; en indien die skut met 'n enkelskoot haelgeweer skiet).
- d. In alle oefeninge tel 'n gebreekte klei 1 punt ongeag of dit met die eerste of tweede skoot gebreek word, en word as "kill" of "one" deur die baanoffisier geroep.
- e. 'n Enkel klei wat gemis word met albei skote, word as "lost" of "zero" deur die baanoffisier geroep. Die roep word slegs gemaak na die tweede skoot gevuur is.
- f. By dubbel kleie het skuts een skoot vir elke klei

- g. By 'n dubbel klei mag die roep “kill” en “kill”, of “kill en “lost” of hoe dit ookal mag wees, slegs gemaak word nadat die skut na beide kleie geskiet het.
- h. By dubbel kleie mag 'n skut kies om albei skote na die eerste klei van 'n dubbel te vuur indien hy die eerste skoot op die eerste klei van die dubbel mis. Die roep is dan “kill” en “lost” as hy met die tweede skoot die eerste klei van die dubbel breek, en “lost” en “lost” as die eerste klei dan met beide skote gemis word – die skut verloor dus die tweede klei.
- i. Skuts en die baanoffisier moet die tellingkaart teken na die rondte. Tellingkaarte sonder die skut se handtekening sal nie aanvaar word nie. Geen regstellings van tellings en/of kategorie-inskrywings sal na die tyd tydens enige van die SAJWV se haelgeweeroefeninge of by enige intertak of nasionale kompetisie gemaak word nie. Skuts wie se finale tellings vir watter rede ookal nie klop nie, diskwalifiseer hulleself outomaties indien hulle sodanige tellingkaarte as finaal inhandig. Hierdie reël sal sonder uitsondering toegepas word – geen argumente hieroor sal gevoer word nie.

12. “NO-BIRD” ROEPE (alle oefeninge)

Daar mag nie na kleiteikens geskiet word nadat die baanoffisier duidelik “NO BIRD” geroep het nie.

12.1 “No-Bird” – foutiewe geweer of ammunisie

Roepe het betrekking op 'n eerste insident wat as 'n waarskuwing geld. 'n Tweede insidente van die aard hieronder aangehaal, word as 'n verlore klei getel.

- a. Albei lope vuur gelyktydig op 'n enkele teiken – “no bird” geroep, teiken word weer gegooi om te tel met die aantal skote per klei toegelaat.
- b. Eerste skoot op 'n enkele klei vuur– “no bird” geroep, klei herhaal met enige van die twee skote om te tel.
- c. Tweede skoot op 'n enkele klei vuur nie nadat die eerste skoot gemis is – “no bird” geroep, klei herhaal met enige van die twee skote om te tel.
- d. Ammunisie weier om te vuur (of 'n “hangfire”) – “no bird” geroep, klei herhaal met enige van die twee skote om te tel.

12.2 “No-Bird” – foutiewe teiken

“No Bird” word geroep wanneer:

- a. 'n Teiken breek as dit die masjien verlaat.
- b. 'n Teiken vanaf die verkeerde masjien gegooi word.
- c. 'n Teiken se trajek as onreëlmatig deur die baanoffisier beoordeel word.
- d. 'n Teiken gegooi word na meer as 4 sekondes na die skut se roep.
- e. Die skut nie die teiken geroep het nie.
- f. Die baanoffisier oordeel dat die skut gesteur is tydens die neem van 'n skoot.
- g. Die baanoffisier nie die breek van die klei korrek kan beoordeel nie.

Alle “no-bird”teikens word weer gegooi om te tel.

13. Erkenning

Slegs die eerste deelname in 'n skietoefening op 'n dag kwalifiseer vir enige vorm van erkenning.

14. Gedrag, toerusting, tegnieke of enige iets anders wat volgens die baanoffisier nie in die gees van die spesifieke skietoefening is nie

Enige gedrag, toerusting, tegnieke of enige iets anders wat volgens die baanoffisier nie in die gees van 'n spesifieke skietoefening is nie, onveilig is of ander skuts verontref mag deur die Baanoffisier verbied word. Indien daar twyfel in die verband bestaan, moet dit met die Skietkomitee uitgeklaar word.

15. Mediese of fisiese beperking

Indien 'n skut met 'n mediese of fisiese beperking wil deelneem, moet die baanoffisier so 'n skut, asook gestremde skuts, akkommodeer na gelang van omstandighede, sonder om hom of haar 'n onregverdige voordeel te bied en sonder om veiligheid op te offer. Sodanige skut moet voor die aflossing begin aan die baanoffisier rapporteer, wat dan 'n beslissing sal maak en die ander skuts in die aflossing sal inlig indien enige vergunning toegestaan word. Waar moontlik behoort ingeperkte skuts in 'n afsonderlike aflossing te skiet.

16. Uittel van wenners met gelyke tellings tydens skietkompetisies

Indien twee skuts wat meeding om 'n medalje posisie met gelykop tellings eindig, word daar teruggetel op hul telkaarte vanaf die laaste teiken na die eerste verlore teiken, die skut wat die langste terugwerkende strook gebreekte kleie het is die wenner, dus is die skut wat die eerste teiken op hierdie terugtelling gemis het, is die verloorde. Hierdie metode staan ook bekend as die “countback” metode. Indien twee skuts identiese telkaarte ingehandig het, word 'n gelykop uitslag verklaar. Skuts kan beide hul kategorie en die Topskut Medalje verwerf. Vir die Topskut/Highgun op Streekvak word tellings nie terug getel om 'n wenner te bepaal nie en moet skuts dus uitskiet (beste uit 10 Kleie) sou daar 'n gelykop telling wees. Vir die ander kategorie wenners op Streekvak mag wel terug getel word. Op die Nasionale Haelgeweer Kampioenskap sal net uitskiete (beste uit 10 Kleie)wenners in alle kategorie sowel as Topskut/Highgun bepaal indien daar 'n gelykop telling is vir medalje wenners.